

書

彭汝礪字器資饒州鄱陽人治平

二年舉進士第一歷官權吏部尚

書出知江州事蹟具宋史本傳

鄱陽先生文集卷

古詩

忠孝圖 并序

燕滁州雍為忠孝圖以遺泚守宋公選公曰此皆古人大節吾昔聞之矣傳于編簡之紛々不如見諸繪畫之昭々目視心惟可以動蕩人之志氣以施之事業滁州之圖蓋不為小補俾某圖之學宮千乘先生倪天隱為之序深悼後世



彭



器資



之臣子蹈邪趨惡負罔極之恩而不知報圖成
其與諸生顧

而言曰君臣之義父

子之愛出天性之自然至於義窮愛弛而甘心
亂賊之名情奪之也嗚呼今為子而思其所以
生育為臣而思其所以安榮推而極之則古人
之心可以坐詔禽獸或知有養奴僕有為其主
死者況於士耶子曰未之思爾夫何遠之有
君親等乾坤恩義俱罔極浮生一毫髮盡出覆
載力我思古之人節義有遺則以身託萬事糜

殞終無嗇名聲落編簡不與日月蝕世薄道亦
微綱常墮荆棘想像不可追徘徊悵惻燕卿
真士雄繪素見顏色謀惟引深思摩揣窮多識
金朱寵純懿斧鉞誅姦慝欲將春秋法轉徙示
九域肥陵泮宮庭收拾在四壁千年土中身精
神回翰墨崢嶸列星辰奴隸生歎息已死疑可
求欲語嗟復默清風凜冰霜直氣森劒戟富貴
喜圖畫蓄聚窮千億丹青彼雖工龜鑒吾自得
願言同此心論世師盛德當使忠孝風自家刑

邦國

宿萬孝子家 并序

唐萬敬儒肥陵人其家同居數世親死廬墓不歸刺指寫佛經數百卷太守盧潘表之有詔旌其門逮今不廢某比因按田與縣令俞君玉宿其家觀迹而思其人相與咨嗟歎息問其聚居曰二千指自敬儒及今二十世矣夫事久而不變物聚而不散非誠於義者不能如是為詩美之因以為勸焉昔人迴車勝母問今我枉步孝

子家天寒日暮林谷暗回旋道路甘泥沙高臺隆隆起門戶松檜夾逕清陰斜縣官抱燭讀碑字夜闌相視生咨嗟今我為詩語萬氏萬事成難敗之易爾家承々今幾年勉旃無為先世累

七門堰 并序

予為合肥職官始按事龍舒出邑之西北門觀所謂烏陽牆牘七門三堰問耆老求䟽治之始漠然無能知者蓋其所從來遠矣晚得劉放貢父所為廟碑迺知始於羹頡侯劉仲而劉馥寔

繼之因自歎曰古人之所為廼能如此劉仲遭
際幸會以得爵位傳所言惟力於耕產耳馥誠
竒士然亦無它稱道而其規畫已足以休福元
元於無窮後世議論太高而亡其實視民事藐
然矣萬一有為則利常不勝其弊而民卒窮困
以死而不救也嗟夫

古人材大心亦公憂樂每與天下同謀功慮事
不草々欲與天地為無窮我來舒城道三堰行
看利入東南徧漁樵處々樂太平稻梁歲々收

餘羨江淮旱澇相綴聯舒城獨自為豐年人知
今日樂其土不知古人為爾天二劉未必真竒
偉謀慮及民廼如此俗儒文多實已亡洋々大
論言羲皇心欲為功害輒勝醫庸未足平膏肓
紛々予亦何為者愛古傷今空涕洒題詩倚立
寄西風不知材力非騷雅

金星硯行

星出雲之端石在溪之澗天上地下相絕幾百
千萬里硯中安得有星點々明如金既非瑕掩

瑜又似微在琴我疑星之飛流運動或不居精
采誤落黥流深不然神靈憫惻學士久濡滯故
借光景資清吟或有感此理杳默難推尋君不
見甌山之石團、有桂在中象圓月又不見廬
江之石扶踈有水相膠為寒林無重言但置寒
窻筆札徃古研于今大剛無睢、至明無陰、
君也能如此是真金星硯之知音

選仙圖

自昔黃老言無為謬說汗漫為神仙古人力探

源未塞今世復用根尤堅仙經自是物外來盡
圖誰向人間傳碧油堂印始等差洞天福地分
後先勢窮或滯艷都幽彩勝即上崑崙顛得失
無端見掌握勝負有勢生回旋終朝相視何為
哉萬事不齊俱偶然物雖無庸意甚遠為子探
取題詩篇

李卿惠太平州學記

李侯昔也治當塗作學以遺當塗民謠言散落
在樵牧事跡收拾歸瑤珉高文大字比珠玉長

與後世為奇珍我因李侯念往初黨序遂序明
人倫井田變更萬事廢士林泣血悲孤秦今人
思慮到本原願見風俗終還醇嘗聞君子天下
志一視萬物無踈親侯來我邦嗣其兄愛惜不
後當塗人即視學宮動風采復尊師席尸陶鈞
道路尚思前邵父問閭敢忘小馮君

瓦鼓

客遊南昌歸、我四瓦鼓瓦鼓自新建渾完自
甄冶質朴排罍甒觸之散遺聲往、中商羽聲

來殆天得不用詢有瞽野心愛不徹取之置林
宇竹梢奏清風似喜佳物伍岸中策筇枝共尔
蠲毒暑世浮見此拙坐覺幽興聚丹楹惜異時
蕢桴想淳古君年比予少能亦珍此否

寄佛印禪師

遣奴持書問雲居我今持節行羗廬請服磨衲
大牛車來飯香積及雕胡舍施琥珀及珊瑚滄
海徑寸之明珠師應問吾今何如謂方據案治
文書較量貴賤調盈虛擒取猾吏如捕狐夜涼

飲酒壹百壺醉視萬物渾
錙銖雲居若言大鹿麕
踈謂我寄聲謝云吁

去季行建昌作詩招雲居元禪師近過
南康不見用前韻馳寄

雕金間壁雲中居卧龍更有文公廬門前不設
羊牛車誰將虎鬚跋狼胡寶林環繞千珊瑚中
間一點磨尼珠遊戲樂說心如如諸方傳錄為
竒書愛師談實非空虛生決定信無疑狐表裏
洞徹如冰壺輕重已自分錙銖咫尺祇恨相逢

踈各自有口能無吁

禪師和予詩云有
口喫飯誰能吁

答趙溫甫見謝茶甌韻

我昔曾涉昌江濱故人指我觀陶鈞厖眉老匠
矜捷手為我百轉雕輿輪鐫頑刻畫走風雨須
臾萬態增鮮新盤龍飛鳳滿日月細花密葉生
瑤珉輕浮兒女愛竒屈舟浮輦運傾金銀我盃
不野亦不文渾然美樸含天真光沉未入世人
愛德潔誠為天下珍竭來東江欲學古喜聽英
傑叅吾倫謹持清白與子共敢因泥土邀仁恩

空言見復非所欲再拜謝子之慇懃

雪夜飲分題得雪字

顛風夜號花木折平明堦前三尺雪誰家羌笛
落早梅中夜南樓對明月苦寒侵人毛髮縮厭
厭夜飲腸內熱公才奔放欲萬里應恨低徊受
羈紲一巢安穩身自在生涯却羨鴟鳩拙人生
所值俱所樂萬事悠：無可說偶有名酒須盡
醉：輒題詩如靖節君不見萬卒征南凱未旋
戎衣雖厚冷如鐵

和深之飲字

窮陰方欲歸故：作凝凜乾坤幾日雪晝作宵
還甚寒威鎮氛沴和氣生豐稔君子有酒食啖
健亦豪飲壘鹽本吾味笑此已多品芬芳臭如
蘭爛熳文似錦夜闌燭花低更轉烏聲噤私飲
樂已湛情話言尤審駑才負荷重終夕無安寢
樓頭鍾幾聲輾轉屢欹枕

和亶父夜字

雪輕不自持風急更相借仙人集蓬島鴻鵠雲

中下飛騰障空虛細碎穿隙罅光明入幽室晃
耀不知夜苦寒為公飲酒盡解貂貫盤蔬起鄉
思披綿間鷲鮓浮生夙何緣今昔同官舍才調
稍迫促每羨公優暇草玄入幽微曾不解嘲罵
文衡委輕重事亦宗伯亞我愚實非稱得友還
自詫兩驂萬里心雙壁連城價塵土難淹留雲
霄者高跨

和執中游山四詩

谷隱寺

谷隱多牡丹一花百千葉一根出一切一切一
根攝愛君看花處立悟恒沙劫其誰知此意祇
有花間蝶

又

樓閣倚天外鍾梵落人間俗客有時去野僧長
日閑白雲何所往飛鳥未能還一往輒一嘆令
人唯厚顏

峴山

井崇如衆木峴首如衆山燕人愛召公公去不

忍攀襄陽思叔子墮淚濕孱顏至今山外溪日
夜波瀾翻如公章貢祠宜在之子間郡執中治虔立生祠

高陽池

三年南雍居十五一作至高陽魚池鳥如故人相
忘不相疑但持青蓮葉不倒白接羅我與之子
遊何似山公時

內鄉山中二首

野人住山中不見山色好我行久塵土窺覽慰
懷抱禹稷不乏人翻馬憶商皓使我有以食井

於此山老靜喧豈殊途能靜理亦好所以見山
色愛之置懷抱攬鏡照鬚髮已如霜雪皓吾方
與神遊未肯塵土老

寄葉法曹

參軍琢玉為天性靈臺一點秋江靜少年勤苦
取富貴不知勤苦今為病世人喜邪疾中正愛
君與物終無競圍碁坐爭百局勝雕弓力挽六
鈞勁碁子勞神弓力硬此圖養疾俱非令作詩
勸君今勿更詩書自足資游泳與室重簾瑣幽

逕我不見君心恸、疾病勿憂有天命愷悌君子神之慶

送皇甫法曹

始予來肥陵問士得皇甫皇甫子仁經年在問

卷不肯出公府樽俎獻酬間為之賦翹楚今上

襄陽官拙詩愧兼取襄陽真名區碑碣字多古能

因東南風取以寄予不

寄友人

漢上近多雨江頭應好風想君當此時掛席隨

孤鴻翔龍壓大浪盡鷓凌長空男子四方志生

時射桑蓬爾來何遲、吾憂祇仲、安得百頃

田稍隣五老峯蚤賦歸去來同為採芝翁

和君時弟見貽一首

鳧短非不足鶴長非有餘太山逮毫芒其理同

一如君才乃驂騮行矣無踟躕萬里不加鞭日

力復有舒豈如老駝馬寸進徒渠、低頭戀短

豆時復仰天嘘徊徨槽檻間不用論智愚惟中

可以休吾與子歸與

送范侍郎歸許昌一首 四言

鳳鳥嗆，其羽儀。其集伊何梧桐之枝，鴻飛
冥，其翼差。其止伊何清泠之池，朝廷於公
夫豈不知國有大疑爰度爰咨公雖家居如在
廟堂國之大經論討靡忘公在仁宗時數論尺
樂公亦預議今雖家
居然討論猶不廢徐公車在汴之郊薄言
追之以永今朝汎公舟在河之陰薄言維之
以慰我心公賜我言我斯藏之何以報之羔羊
素絲秉德不遺公飲我酒我斯酬之何以祝之

秀髮厖眉受福無期

讀史

婁敬脫輓輅獨建金城安韓信羈出旅遽上將
軍壇謀出萬乘驚名飛百夫嘆丈夫松桂姿直
氣虹霓蟠得時樹功業未謝婁與韓

管仲有老母

王陽為孝子王尊未能非管仲有老母鮑叔獨
能知同途不同行亦各有所思今或有斯人執
鞭吾不辭

暴雨

雲如驚瀾如潑墨萬竅怒號四山黑電母搖睛
嚇風伯疾雷怒張坤軸側雨如河傾如雨石上
山下山泉動脉石漂木拔崖裂折高原立脚成
大澤古寺顛前後崗逼瓦腐椽折破無壁泥佛
露頭水浸一作臆苔錢藤蔓生金碧背堂衆流
如箭激挾氣急欲投開隙衣製脚芒者溝澮有
惻然徒老荆棘荷戈與艾甲不釋中夕愁居晝
艱食我今乃敢求安席問閭人家水沒極壯夫

浮泗老者溺高占鳥巢據援杙可憐欲走無羽
翮我起熟視惟嘆息斷蘂棲苴在簷額雞飛犬
跳上屋脊蛟鼉睥睨迷所宅乾坤欲晴但頃刻
廣庭泥深猶數尺大浪如銀沸阡陌萬馬相蹠
轂相擊窮民欲炊無釜鬲蚯蚓在堂魚在闕兒
童捕魚不知戚溪南不能過溪北跬步如越與
胡隔溺者漫一作汗不見蹤跡東村西村哭聲塞
手援不能淚沾臆掩柴雖欲終何益天理嗟嗟
杳難測惇獨無辜不愛惜葬填溪魚瘞砂礫乃

能屈折容盜賊鑿險開深聽藏匿不以血膏膏
鋒鏑皇天無情禍福直昔也昭々今惑々我歌
且謠寫悲惻竹林一夜生秋色

和執中遊山

峩々楚山前屹々樊堞後汗漫清漢左蜿蜒大
堤右雷霆沸波瀾龍虎卧崗阜春風無偏陂潤
澤到藜莠日月有底急急々似奔走樂哉城南
游矧復得智叟橫踰路東頭縱踏山北口逶迤
陟嶽峯莽蒼度林藪巍亭立青冥隱几見十部

崖石險欲落參差露妍醜沉深開殿閣闕穴得

圈臼尚或埋泥塗誰能斬薪樵慶同諭主法海

惟我沉禪関與君叩清泉給醍醐一飲失塵垢

丹鳳杳不來瞻想更搔一作首潭谷中寺花

木照堂坳樓閣寄岩堯欹危貼星斗白雲雜香

霧終日在户牖有沼旱不枯金蓮豈凡藕不見

白馬至似聞蒼龍吼一雨作豐年懽愉逮雞狗

說車高陽池遺事問黃耆嘆息當世士所懷自

非苟方醉白接羅寧貴朱組綬拭目墮淚碑徘徊

徊想忠厚河內借寇恂南陽祠杜母彼惟一純
誠名等天地久愛君所志遠堯舜望高后談經
破小辯獨自持綱紐德愛在章貢其崇不枯朽
執中立治度遭迴久荆楚白髮嗟未偶軒昂更自
拔怵惕匪人咎寧其凍餓死不一變厥守吾惟
人間世所遇皆所授生死等夢幻可能誦然否
譬猶二人弈日夜競勝負紛紛置黑白畢竟一
何有但願山下水盡作杯中酒時時與君醉獨
與造化友忠臣不忘君不問在猷畝

次韻堯民同年

飛雪鱸長鯨浮蛆撥新酒故人不在我過絕壁頻
回首北崗無斷絕參錯紛燕豆觸目事斬新愴
懷治平舊龍飛第一榜四百如蘭友勁氣沮金
石高文爛星斗我衰也久矣彫落幾無有未去
真厚顏欲歸猶掣手肘盤根發餘刃想見敏捷手
江河被郭郭雲霧生戶牖顧瞻良集易嘆息幽
期後凝到詩輒成吾窮久箝口

谷同舍游祥池

仙宮神靈之所宅樓閣倚天一千尺先生好游
猶挾冊藜莧不慙吾鼎食凝祥池頭三月春腰
金騎狻多貴人天邊五岳煙霞閣海上三山雨
露新蛺蝶能飛燕能舞鳳凰在雲鴻在渚仙人
參鸞入雲霧寂々不聞青鳥語洞天落晚日沉
沉漁舟縹緲桃源深紅玉生看花着子青雲行
見葉成陰疾雷怒飛風雨急瘦馬不行歸旆濕
投間一日須一來歲時變化猶呼吸

栽竹

一生正能着幾屐曠達人稱阮遙集何可一日
無此君風流我愛王叅軍夏葛冬裘吾便足由
來世間無可欲但栽翠竹滿東林我日對之歌
且吟

送君宜之臨城簿三首

人之與萬物異名而同體貴賤何以殊知與不
知爾知之莫如學一本云貴賤曷以分知與無
矣知之學莫如修知耳謂人或無知亦物而已
莫若學莫如修汝學自有得願言惟不已
不已須終一作自到不到由中止請觀為田者日

夜夕一作服耒耜久之田自熟其入須倍蓰至於
耕耘廢稂莠敗糜芑常時不用力畚獲終無幾
予與爾知田肆言聊及此

事賢如事親敬長如敬兄讀書如喫飯近欲如
近兵百事摠欲是一言不可輕汝能慎于初更
欲觀厥成仲弓舍予南汝今復北去南北牽我
夢終夕無定處但寄兩眼淚為君衣上露會知
老者心從爾無蚤暮

送范侍郎帥慶州得以字

池水日夜流日行無停軌人生長道路擾、還
如此莫辭飲我酒、盡君且起贈君雙寶劍有
言慙近俚聖人之於物愛視猶一子一作視之
顧復愁不至不知分此爾誰茲較尋尺竟未知
所以夷外當反內刮毛湏及裏邊垂今無事自
可緩帶理願君宏遠業赫、光祖禰

送穎叔帥臨洮

風如疾雷電如茅積雪如丘壑道路蔣侯車馳
挽不住見說西人復嘯聚目視陰山欲飛去蔣

侯文如江海注一決萬里無盡處筆落在紙成
雲霧氣吞雲夢八九數力轉丘山縛螭虎終日
笑言公不怒三軍號令成樽俎羗戎膽落汗流
沂邊人乃至歌五袴昔誇禁中得頗牧今見南
陽稱召杜前席宣室疑已暮勒功燕然無可慕
歸來遍作人間雨杖杜吾當為君賦

舟中大熱夜半起坐因作是詩寄諸友
星辰與天旋河漢入地流其行雖不同晝夜不
自休彼能致其誠豈不至誠由如何爾為士乃

不疆厥脩功不償其食不如馬與牛金朱豈不
寵顧視祗可羞誰謂古之人乃無一可憂何以
圖厥終尚惟友之求

彥衡約飲湖亭行不及赴

主人欲留客其意良已厚行人念行役奔命惟
恐後張帆半夜起檝若驚蓬走盈、水中蓮鬱
鬱堤上柳相別不相見已行更回首人生如朝
露理固無可久可為惟為德萬一或不朽行也
死後已庶猶無大咎君恩不勝報聊一報我友

宋履中示月桂佳篇并聖俞詩因賦四

韻

古人種花昔已老後人種花今更好聽詩令人
飢頓飽嘆息古人不可到庭中花落君勿掃醉
飲全勝藉幽草白髮不嫌花壓帽寄聲我友車
先膏

再用前韻書呈諸友學士

凡花朝開暮即老仙桂春花秋更好幽砌終年
看不飽洞門無日春不到玉樽一挹把筆掃立

脚詩成不立草醉倒淋漓應落帽月明冠濕雲
如膏

察院學士灸熯連日戲作鄙句

截艾作炷大如椽三日徹夜燒丹田心腹生火
口生煙皮毛潤澤骨骼堅舍仗趨走脚輕僂赫
如渥丹顏色鮮五十六歲如少年顧我一生百
述遭病多未老先華顛欲灸自量無罪愆一切
久矣付諸緣三月人家花欲燃陽春水色碧於
天更欲載公清翰舩喚取佳人舞繡筵一飲一

斗醉不眠不怕世人笑
逃禪火中自會生經蓮
作詩問公奚若旃
肌肉忍自投戈鋌
直顧厥後勤着鞭
萬事悉置心超然
服食不須求
汞鉛公名已自列諸仙

再用前韻呈察院學士

真人養真如養源
道士耕道如耕田
吐納日月踏雲煙
牢如金石齒牙堅
捷如猿猱身體儂
沐浴霧露甚榮鮮
受命一萬有千年
既安且樂無迴遭
後人好惡紛倒顛
酒淫蠱惑作罪愆
墮落

世網縛塵緣
愛河流轉業
火燃猗公淡泊其得
天泛泛乘世如虛舡
精神采色照四筵
老鶴飲露夜不眠
戲笑中有第三禪
淨不着水花如蓮
酬酢不停奚敏旃
賦詩馬上橫
艾鋌不放祖生
先着鞭
北方灸炳自古然
其力十百倍
凡鉛功成不祇飲中仙

是非寄君時

一或以為是一或以為非
是非如環中畢竟無窮時
汝唱我其從
嗟吾亦何為

自然

皇天典下民實亦付自然禍福與是非日夜相
推遷譬猶泥在釣隨分有醜妍醜非其所惡妍
非其所憐彼憐吾不知方知樂其天

行西城

我將行西城曲指計日月汝來今幾時已卜錢
塘別吾衰况多病苒、髮已雪安能久去汝漫
自投羈紲田園苟可飯聲利非吾屑與汝歸去
來相看至耆老至蒼茫尚無淡空復愁如結

漢上謁劉執中

塵土能污人有如衣匪澣驅車出闔閭縱目盡
江漢渙舟汎青雲蕭洒鴈為伴蘆花如飛雪時
逐風散漫可憐獨清人憔悴行澤畔

答君時用前韻

振衣近滄浪聊以垢膩澣仰看冥、鴈肅、在
雲漢吾今寡所合爾獨為吾伴蕩舟汎江海四
顧畏汗漫君看水中坻不是無邊畔

口占和君時

吾生有窮通吾志不可衰飄飄如浮雲富貴我何為我今樂不淺我歌爾其隨譬猶長者家畜聚不可訾怡々任天真何害為俛々人惟學不學高下成雲泥是非惟所求萬物豈我私君看鑒中明不隱嫫母媼君病本自無吾藥奚所施惟作日新銘與汝同為規

菊苗二首

重陽黃菊花零落殆無有微陽動淵泉嫩葉出枯朽青々好顏色寂寥霜雪後物理如轉環開

花豈其久

物理如轉環昔亡乃今有眷言籬邊菊根葉未終朽盛衰各一時何足競先後彼花以無情能並天地久

採葵

古人採薇蕨我亦愛斯葵能隨朝陽傾不為秋露萎烹調戒中厨聊以燕母慈拔根取廉名未愧魯公儀

薺

陰風號暮景零落悲晚秋紛々彼芳薺鬱々此
中丘作井豈不珍冒寒不為柔薄言擷以歸呼
奴具晨羞

途中和君時二首

相望不相見一步一回頭况汝將有適前之正
悠々土壤去宛葉星躔近斗牛不知明之日何
以解我憂

聞君欲脂車輾轉睡不安憂心頑如石百計不
可寬鴟鳩祇在桑歸鴈乃雲端一瞻百嘆息強

飲終無歡

行役

行々重行々吾役幾時休春風不相饒塵土滿
敝裘人生能幾何乃有千歲憂須知一罇酒可
勝萬戶侯

南陽

復尔行南陽興言涉清漢日晴川谷明風靡花
竹亂遙瞻萬山麓近眺樊城岸南比有化離令
人感鴻鴈

途中

一日復一日悠々竟何之萬物但此理百年能
幾時墨翟悲已誤賈生哭奚為可憐日月輪日
夜爭東西

早起

客心不能休未曉輒欲起耳凍南山風衣冰北
溪水捨我一息勞先行十餘里因知人之學患
不勉旃爾

鄱陽先生文集卷第一

鄱陽先生文集卷第二

彭汝礪器資

古詩

昨日餞趙教授行會飲秀楚堂晚徙櫻
桃花下夜月上正夫設燭于花上光
明焜耀昔所未見正夫因約賦詩

夜涼月色清如水天靜無風塵不起移酒近花
坐明月盡燭橫斜插花裏月寒燭艷花淡薄意
思相疑不相似一下一高揔能見半白半紅渾

可喜時有幽香闇着人更分踈影低臨水密成
雲霧即成陰團作珠璣看結子異時尚擬與君
醉景物更作今日比富貴功名是底物人生百
年行樂耳

再用前韻二首

朝日薰酣晨露洗中林入夜幽香起燭與花明
月影中月和燭照花陰裏光華混雜不可認刻
畫雖工難比似燭偏月下花亦別踈影橫從俱
可喜使君白頭衰久矣空惜流年去如水作詩

與花雪羞恥多才自屬佳公子青春九十今能
幾不當祇作常時比莫令俗事一關心可厭浩
歌頻到耳

夜色清如水新洗月上燭明栖鳥起灼灼其華
散成綺僊翁岸幘光明裏公明如月非如燭文
華亦非花得似安危自以天下任故與衆人同
笑喜手折芳枝嚼紅蘂臨池想濯滄浪水芳菲
肯付遊人醉知公愛民一如子月盈易虧花落
易直須催促公排比公看光陰去無止歛如白

駒過隙耳

次正夫登沛中歌風臺

此、泗上城陰、沛中臺登臺不見人祇見山崔
嵬高祖湯武資神明天所開乾龍已飛躍屯馬
更遭迴倒戈與天旋萬國俱子來西楚殪封兕
東齊蕩纖埃任使雖故人蕭曹亦賢哉功成思
猛士樂極自成哀如何古之人懿德乃所懷

次正夫相寄佳句

朱橘大可圍白魚濶盈尺掀林擷葩花艤岸披

的皜我酒清且旨於馬餞佳客鴻飛不知遠日
暮寒雲碧回瀾祗如昨不見舟行迹寄詩何道
麗若見好顏色遙想翰墨揮波濤瀉胷臆維纒
遠林外坐看晨風翼萬物歸一致知公無不適
人之與天地同是為形後

次正夫宿留侯廟韻

龍飛景雲從林茂衆鳥息真人翔灞上多士生
王國留侯豪傑士乃獨為其得韓亡竟不去漢
危愈厲策不見馬上功奚多幕中畫眇焉視嬰

布若數百與億鴻鵠已高飛翩然歛歸翼堂
高皇業屹立如磐石始卒如公者是不慚廟食
載瞻水邊祠老檜寒更碧

次正夫途中懷親韻

動靜非兩途久勞逸更好開門看白雲婉々出
山嶠身閑亦已樂言念親及老豈無青精飯每
食終不飽鏡中髮如漆一夜成素葆言歸采其
蘭堂北種萱草日以五鼎食不如綵衣老我今
無此樂感泣形已稿日夜思故鄉歌眠夢郊保

次正夫途中蔬食韻

昔未與公遊同志不同居我寵居鳳掖公名專
石渠醪醴賜上尊膏羶給天厨彭城作逐客事
事胡越殊尚慙素飡詩苦畏城旦書豈能萬錢
食謬駕雙輪車時々置盃盤登眺隨所如公行
適在野乃至歌無魚人生一世間百年實斯須
無所不可安何獨貴紆朱飲河惟滿腹奚欠亦
奚餘作詩促公歸去直承明廬

正夫卧疾予往謁之正夫置酒因作是

詩

來問清漳病煩置東武酒敬窺石窅君愛始士
衡毋大論窺道奧禪關恣深叩是非棄糠粃直
與造化友人游於一世萬事俱非偶養疾先息
念息念它何有此言乃良藥不在砭石後匪日
從公游徑醉須五斗

再用前韻

從公飲輒醉醉德非醉酒噬肯易子教義應容
拜毋歌聲清以長發若金石叩予非多聞者或
似直諒友身世飄流並神形條達偶萬事實一
夢奚亡亦奚有是非可姑置試俟千載後但願
酒不空何庸印如斗

和君時十章、四句

猗彼君子篤志乎道、之云遠於焉慥、猗彼
君子克誠其身匪祿是榮日以養親孰遠孰從
曰吾從義孰去孰與曰吾由禮温清匪偕云如
之何彼得失茲得失孰多吾斯未信吾顏之厚
重輕惟法於尔何有尔旋尔車不知其期我陟

其崗祗益我思凡人逐物其力則倍苟知其養
是用無悔無悔無尤是則養親尔慎旃哉以慰
母心為山一簣懼乎或止道之云遠冒云其已
我田我田以遲尔歸何速于行姑樂我私

寄君時四章、四句

我脂我車陟彼高岡母也吾懷匪居或忘我帆
我舟汎彼大江母也吾憂食匪或皇我池有魚
亦可以羹何必鮪及鮪叔兮其歸哉我田有菽
苟可以食何必稻與梁叔兮其歸哉

一章、四句 二章、三句 二章、五句

寄君時

我治斯何曰治吾身我事斯何曰事吾親我學
未信乃先從仕孰云乎自治我親載老不知乎
養志孰云乎善事嗟、予季言以訊予有詩有
書是足與居叔兮其歸與嗟、予季歌以啓予
有田有廬亦可與叔娛兮其歸與

送甯和仲六章、四句

我思古人克誠其心如陟于高如臨于深我處

于中而舍其偏我弃其零而取其全勿謂道遠
我至之難我勇以前人孰我先勿謂過小我姑
為之千里之差始於毫厘舅兮舅兮子我所器
子誠不已我今所畏子能吾取吾誰之匿子銘
于盤以視朝夕

寄君時四章：四句

春之日予侍親遊采菊苗以歸念吾弟之未見
也因寄是詩焉我灌我園有采之心予以擷之
既有且多我遊我庭有菊之苗予以芘之既昔

且時我思昔人亦采其薇我樂所安奚愠其微
仲兮仲兮曷日汝偕以事以遊以慰于懷

元祐元年十二月庚子雪牛首土湖結

冰鵲鵲群集于上者至不可數感而
作是詩也

宛彼鵲鵲其樂孔群彼類維何而有若于仁兮
宛彼鵲鵲爰集于冰彼至維何而有冽其清兮
宛彼鵲鵲既飛且鳴彼行維何而有篤其誠兮
于誠兮

寄寧和仲二章、四句

鳳山之泉孔潔且長止而不流是不如汗潢鳳山之木可棟大厦舍而殘之是將與荆棘而並化

送張子固詩并序

大理寺丞致仕德興張公偕先皇考執友予十六七時從其子正父季友學明叔禮遇予厚明叔子：固娶予作賀客畢席復入宴予時善飲寺丞公取大白觴余厥容幾一升戲曰能復飲

子魁天下曰能連三引皆空客皆大笑樂甚予後忝竊公笑曰長者言果信後子固有子根子見其為童兒疑、然有立又見其為太學諸生遂中第元豐甲子備使京西與子固遇襄道及故舊連日不能去曲指當時或化為鬼或老為叟或窮且病飢餓不能出門戶蓋無有赫然顯榮者而予更罹憂患鬢髮班白相與飲酒飲絕少亦醉、亦不樂無復少年時氣味因嗟嘆久之予曰凡人少不得不壯、不得不老、不得

不死、亦不得、不生、猶之寒暑晝夜一往一反、無窮盡、此自無足怪、惟君子能卓然自奮立、不係得喪、不懸貴賤、雖老而聰明識慮、如少壯人、雖死而聲聞不亡、如予之昏溺不肖、乃怵於所養、竊食苟祿、終恐不能免、與草木並腐朽、雖然、敢不勉、子固少予五歲、嘗薦開封根、任即不復言、進取其志落、然自奮立者、是不難、亦勉之而已、子固曰、予敢不承、又曰、吾邑公所遊、吾父後徙居吳園、稍有臺榭池沼之好、閣曰詒謀堂、

曰聚經、曰至樂、曰集虛軒、曰覺亭、曰山曰觀德、曰思賢、曰紫筠、曰澡雪臺、曰四并池、曰四曲、皆欲乞公詩、某曰、德興山水之勝、予游最舊、且數不至、今十餘年矣、其登臨之樂、往、時見於夢寐、其發於篇章多矣、今所賦何辭、詒謀聚經、子固更名予、命曰燕閣、曰書堂、蓋名簡而理無不在、云、正父諱汲、終大名府判官、季友名湏、終殿中丞、淮南西路提舉、常平廣惠農田水利等事、明叔諱潛、子固名磐、根、今為臨江軍司理參軍、

吾少飲酒不知數有如長虹吞百川老來畏酒
飲輒醉百事一無如少年瘦脚跟踉走病鶴吟
腸悲壯啼寒蟬夫君尚勇不宜怯急上青雲須
着鞭

吳園雜詠十九首

布夷兩韓誅國奪名亦隕芮王獨以正百世榮
如近至今園中草欲踐猶不忍

右吳園

高閣高入雲俛焉視岡阜老來更無事賓至但

飲酒陰功在其鄉更足燕爾後

右燕閣

藐視一簞金獨藏五車書高堂見古今其樂亦
只且以此燕子孫吾誰數陶朱

右書堂

室虛即生白惟道惟集虛詩書掃塵迹仁義外
濠廬形忘心亦忘萬物同一如

右集虛堂

本覺不見覺大夢非是夢覺夢、非覺其歸理

則共兔魚亦既得筌蹄自無用作見為一

右覺軒

飛簷截山出碧瓦貼雲齊水靜見魚樂竹深聞
鳥啼春風花落處誤認武陵溪

右山亭

男兒厥生時弧矢射四方茲禮古所重嘆嗟今
已亡典章可披尋君試行一鄉

右觀德亭

大風無邪聲積雪不改色根方為龍去實擬待

鳳食一日有不見恍如歲三易

右思賢亭

青竹老出籃紫竹嫩施粉樂彼奇節並歲寒不
彫隕言如拾芥者設意毋乃近

右紫筠亭

塵土能汙人譬如衣匪澣窺臨得清曠其去已
太半不必濯滄浪神明自還觀

右深雪亭

時將景共好物與心相投曠覽盡萬物分明一

浮漚此臺無不并樂只臺上游

右四并臺

大池方如矩小池曲如鉤方奚避汗辱曲不擬
公侯時傍白蓮葉獨行青翰舟

右四曲池

枝幹上參天長松不枯槁朱頂雪衣裳仙鶴顏
色好主人一千歲似此還一作松鶴老

右眉壽堂

徙竹種前林栽松滿幽島主人無所憂不用植

萱草吐納奚所事忘憂自難老

右忘憂亭

秋月如秋水滢徹萬里流我欲挹其清登彼百
尺樓隨時有佳趣不但是中秋

右秋月樓

多稼為豐年觀言亦云樂秋雲滿原隰漫不知
厚薄帝力彼焉知陶然飽耕獲

右觀稼亭

衆人貪狗財種利不種德誰如之人心白首能

戒得以此風里問貪競當自息

右戒得庵

豈不有春華不如秋後香紅紫不禁風黃花耐
雪霜幾時登其亭未泛彼觴

右秋香亭

衆山走蜿蜒高閣立崔嵬流水橫其前時有薰
風來聊可解吾愠敢言阜民財

右薰風閣

晨起祠先農道中

更闌燭花低呼僕起視夜問夜如何其露落月
未謝皇帝共神明朝燕或為罷多儀禮有敬少
怠刑無赦今茲先農饗上意在耕稼駕言投明
起不敢私安暇馬蹄踏冰雪霧露濕鞍馬寒林
月中影十里開圖畫燈火望壇場冠裳出次舍
鏘洋響金石聲香紛彝筭百年禮樂中萬事無
雜霸昏冥久塵土今日聞韶夏心知至誠通自
可膏澤下清風有菽麥密桑柘人家實倉廩
廩得以時婚嫁四夷共安富兵偃祭類禡山川

百神寧天子樂二假敢後秋冬報還見擊鼓御
顧予真缺然何以補漏罅尚堪逐農樵擊壤歌
聖化

自吉泛舟入贛

我行欲從車好風苦相招謂言困行役厭此道
路遙駸、四駱馬終日在岩窈簿書更迫隨精
耗髮欲焦乃復汎栢舟錦幔蘭為橈是時春始
和暖風秀茗彼柳已青、彼桃已夭、王事敢
不修我飲歌且謠彼不知之者謂我士也驕不

知非所知我茲以逍遙

胡鷓

秃鬣胡鷓色如玉頰拳突起深其目鼻頭穹隆
脚心曲被裘騎馬追鳴鵠出入林莽乘山谷陵
空絕險如平陸臂鷹緹犬紛馳逐雕金羽箭黃
金鏃爭血雉兔羞麋鹿詭御得禽非我欲莫怪
小兒敏捷強老宿胡人以此為風俗

六月自西城歸

駕言將西征呼僕問行李吾行無所苟雖遠親

則喜癡兒不知事飲血淚如水憶昨唐許邊逋
逃聚蜂蟻巔崖寄巢穴絕險不可適撲滅無先
幾捕督誤詔旨是時寡妻病吾計或可止君曰
無妾私促裝勉行矣妾病雖云漸姑慈有足恃
是身如浮雲永訣或此始一馬纒登途渠魁掛
市猶虞未寧歸走訃忽在耳羈縻二十年梁肉
飽有幾單車行四方歲月幾萬里私居乃如寄
方此還之彼愛君能知分嗜苦同甘旨誓欲相
厥成完百無一毀中流即我棄我恨無涯淚家

貧未能去顧惜尚壯齒含愁復于行嗜祿祇自
鄙悠、涉清漢欲往轅更柅滄浪照顏面不與
舊相似蓬髮生雪霜龜背點泥滓驕陽恰中復
早魁方哆侈山川惜陰雨我稼病未起高堂蔽
重簾捉扇衣屢襦乃茲趨長途登降遍列苑簡
書况有限暮晚未檐弛山名初外朝岌業超衆
歸自均州入金州山名自外朝始其畧可記曰
來方城羅巔長遥端起霍山呼嶺龍泉鷺子句
平磊石女媧狗春馬鞍畱停越嶺鳳凰而女媧
最為高且遠其晴天出萬象擾、誰經紀濫觴
它不可勝數

一拳多結構五九累蛟龍跨鴻濛殿閣聳礧礧
或植如劒戟或覆如釜錡或視而錯愕或行而
迤邐或大而無當或立而不倚干平七峯老秀
拔匪衆比耆舊今所貴瞻言但擊蹠馬息聯八
疊培塿者岡岷籃輦勞攀牽卒餓弗克仔肺聲
幾成雷背汗欲濡軌吾疲尚能徒步驟托杖履
豈不有林木日晝方如燬曉行怯霧露夜涉愁
虵虺屋頽菱窮閭魚餒飯乾米田功微梁稻圃
學蕃麻梟截筒戶割漆剝楮人抄紙千楓立青

冥萬竹秀披靡時得流泉濯漑移日晷清音
有可樂往中宮徵孰謂彼房陵千家住清泚
神仙隱九室綽約如處子安眠費春秋官爵弃
敝屣寶公浮杯來宴坐有舊址甘雨隨衆緣凶
年作蕃社欲遊嗟不遑悵望祇懸企東西更多
山小大或億秒未經夏禹鑿想待愚公徒橫梯
險相聯曲棧危半阨避就為俛眉循緣或顛趾
女媧高第一僅去天尺咫黎明登其巔星宿可
俯視扶桑出曉日洞徹表裏丘陵雜繭粟草木

浮糠糝補天聞故老豈或有此理天之於空虛
一大器而已物或有不完補之非天恥酒觴荐
明誠感嘆至橫涕畱停鄙媯墟欲至更迤邐煙
嵐相薰蒸闇黯常及已雜民久薰陶頑吏傲鞭
箠令人愧滿面虞舜昔居此商洛不十舍怒馬
想黃綺奔馳浪南北僂俛慚祿仕紛々昨夜夢
慈母倚門咲願騎雙鴻鵠更挾四駟馬言乘溪
上舟出宿城邊址峯巒欲飛去峭拔陵天委神
竒雜鬼怪巧絕非刷削龍盤秦世松玉滴堯時

髓波瀾雜霧莽蒼在隱几平生貪幽勝短棹行

復艤一灘復一磧却望無首尾自漢陰至襄灘

九十嶄々邊傍石出沒竟談詭細垂一絲縷大

作十虎兕衝撞非雷霆震蕩岸欲圯元龜鼉不能

游蛟蜃得所悖懸流落千仞急疾過發矢浮生

真如葉轉足見生死篙工相號呼熟視但如砥

興予且從陸厥計亦非是吾生自有分纖悉不

在已緬思濠上魚載顧山梁雉未能脫韁鎖可

恨譏鑪錘孔卧弗煖席禹行尚乘桴所慚一無

補虛冒思私被夜涼泛明月不寐對瀟灑鳳林
莽何處草木秀蕤、槎頭縮項鱖不減河魴美
習池今可遊樽酒慰勞只鴻鴈香未來將詩寄
雙鯉

寄君時

豈不有性靈稍可學操縵公私足憂責耗蠹幾
大半馳驅寢食廢真自殘軀幹叔兮識至理真
偽不可亂讀書老不輟夜坐頻達旦特立無倚
着剛嚴實子憚歲時有多少每復愁分散顧瞻

鵲鴿飛俛仰發浩嘆安得桑麻田穀粟粗可飯
晨昏侍萱堂綵服何粲、箴切庶寡尤詩書恣
娛玩相從不相離如彼鴻與鴈

觀畫

少時馳車走四方馬跡遍無邊疆北踰崦嵫薄
扶桑遠陟羊腸上太行歷參涉昂捫亢房蕩舟
溟渤浮河潢五湖彭蠡窺沅湘蛟龍出沒鱗鬣
蒼大浪震疊鍾鼓撞怒蜃結構珠搖光游魚鯨
鱣鱣鮪魴鰻勅沉浮旅鷺鶴大鵬一飛凌鷲鷯

中林荃蕙雜蘭菖妖紅漫綠艷靚粧回溪曲覆
秀簣簞老松怪栢號風霜桂丹楓赤楠抽黃閨
風仙人醉瓊漿前旆虹蜺騎鳳凰雲臺曲壁絡
竒璜縹緲天樂非宮商我欲從人匪暇遑昨朝
圖書紛開張睥睨舊遊心惚慌南嶺赤日西玄
霜愁雲不開雨雪雩變化倏忽無經常陰樓傑
閣鬱相望遠峯巖窠挿彫梁高人騎馬見牧羊
牛車魚艇浮纖芒蒼鶩無聲浴滄浪熟視却顧
疑騰矐驊騮奚為棄路傍骨骼雖老終軒昂重

陽籬菊開煌煌：恠見桃杏爭芬芳梅花一枝忽
自折半髻歸聞幽香文陛網戶綠綺窻中有美
人豈娛媼流珠蛺蝶金鴛鴦一盼少年猶斷腸
蓬萊宮中日月長世界凡幾炎涼悠々彼樂未
遽央碁局未知誰子強厖眉老僧坐道場手捉
拂子據繩床似達至理言慮亡惟我知彼真荒
唐乃知畫工匪其良倒置高下翫陰陽鬼神醜
恠不能藏咫尺千里無準量屈折海岱留縑緗
物象涕泣愁斧戕貴家欲得心奔忙背錦軸玉

紅綈囊君亦愛之未能忘苟不溺心奚所妨我
今與公陟高岡坐視四海超忽荒圖史羅列耀
文章前有虞唐上義皇左右孔孟從莊楊朝莫
見之心肅莊議論興廢評否臧卑陋不肯數漢
唐廣莫之野無何鄉我與子樂奚其將

答蜀公謝寄酒

彼酒孰為之湛然若天成為之非草、織悉中
度程其香幽蘭色不減瑤瓊采、白菊花亦酌
潭水清潭水取之源擇菊廢枝莖我將饗明神

乃獨以其精千里馳寄公非將解公醒祝公百
年壽多益不為盈想公初飲時瑩徹顏微頰幽
吟倚崑石緩步倪層城爰聞在陰鶴載嘆出谷
鶯我聞至人心萬物莫足嬰存亡漫憂喜泛然
若無情此理公得之奚或醪醴并

方城與君時相別遇雨因寄是詩

五更赤晴平旦雨愁雲不開風勁怒霰雹夜落
大如芋日月不出愁如兔足曰嗟予季後道阻
且脩日云暮泥深一尺水交注僕肩不任馬蹄

駐一車十牛不能御晨征忽立乘遽恐汝悲
啼不還顧昔知為快今知誤恨不赭陽一月住
人生百年惟所遇曲折萬變皆歸數乾坤與人
同寄寓擾擾眼前皆細故慎勿動心悲景露九
阪王陽猶叱馭平明天晴卷雲霧驂驪安穩行
道路一日千里如跬步

我行

我行日不休行亦讀吾書朝為忘機鷗夜作不
暝魚日月双跳九乾坤一蘧廬而吾於其間擾

擾亦自如

離家

離家一千里十日不得書不怨天上鴻紙恨水
中魚我行穀伯國明日武侯廬慈親髮雪白安
否比何如

遊峴首

去年冬少雪二月春始晴南遊峴首山東下石
頭城揉藍染江水爛錦貼園英幽亭一杯酒不
用千載名

叔子祠堂

不折亭下柏不採山頭石
羊公昔茲遊千載人
愛惜焚香荐危酒一拜三嘆息
却汎峴水波汪洋感餘澤

恒河

恒河世界浮漚上
漚與衆生久流浪
老蠶作繭祇自纏
枯木生虫不相放
止靈泉風震蕩
昭惠日雲遮障
却語諸人莫惆悵
煩惱菩提同一相

舟行

莫打槳打槳驚鴻鴈
鴻鴈不慕魚蝦賤
暮宿江湖晝雲漢
我不見之其心亂
莫鳴榔鳴榔鴻鴈
飛鴻鴈不是雞鶩兒
我不見之心孔悲

送君時

思親一日如三歲
去家十舍如萬里
投明叔也欲別我
枕上聞雞淚如洗
丈夫蓋棺事則已
君雖白髮猶壯齒
奚慚折腰五斗米
三釜及親胡不喜
弧桑蓬矢射四方
男子生來志如此

高陽池
駕言之石城爰至高陽池是時春始和池水生
渺瀰徒能躊躇顧不及酩酊歸令人憶山翁倒
着白接羅

谷隱寺

樓臺寄山巔屹々與雲齊登臨覽昭曠感慨發
悲悽西顧隆中廬北睨漢陰畦願言脫樊籠超
然此幽棲

白馬寺寺有龍池

老龍挾神機變化無拘攣大作四海水歛為一
泓泉白露泛素液黃金折嘉蓮樂哉襄陽人歲
歲無凶年

春風破窮陰

春風破窮陰草木爭秀發紛敷作錦綉晃耀映
霜雪我行縱披賞欲帶羞白髮相看一杯酒聊
以酬佳節

寄二十四弟

有弟有弟各一隅萬里不見徒嗟吁江湖春色

又歸矣庭檻花枝還有無
欲寄我聲無鯉魚欲
寫我恨無酒壺開編一見
鵲鳩詩潛然淚落如
真珠

秋風一首

晚來雨霽秋風顛
驚我枕上清晝眠
四林荒涼好景氣
萬里掩靄皆雲煙
乳鳩深藏叫苦竹
蒼鶻歛起摩青天花枝
柳葉便彫隕山上松筠
逕儼然

武岡路中二首

朝行黃茅岡暮宿黃茅驛
一岡復一岡如
絡繹一驛復一驛
思親頭易白何時自此還行
李兼晨夕

復嶺重岡煙靄深
晚年多病覺難任
它鄉一日如三歲
遠路家書抵萬金
流水可憐君未息
白雲誰似爾無心
天寒日暮双飛鳥
寂寂歸棲只舊林

鄱陽先生文集卷第二

鄱陽先生文集卷第三

古詩

城東行事去李簡夫甚適可以卜見而

俱有往返之禁因戲為歌馳寄簡夫名必

時監東水門

故人咫尺水東頭我欲見之心悠悠有足欲往

不自由形骸靜對鶯花留我思肥陵昔之遊雲

霧密鑲城上樓把酒待月生海陬月到行午醉

彭

汝礪

器資

未休濡須南池水中洲脫帽散髮尋漁舟夕陽
扶欄把釣鉤白蘋風起寒颼颼別來紛々幾春
秋彼此待盡棲林丘滴泪落水東爭流肺肝雖
大不容憂殘息乃復如懸疣得官相望真如囚
李夫子借使復得把酒與子飲其樂還如昔時
不我今鬢髮已絲志已偷力不能前鈍如牛泡
浪亦悟吾生浮尚壯欲以葦簪投日月逐逐同
傳郵何用自與身為子我歌草々子須酬欲讀
子歌銷我愁

舟過當途

悠悠章江柁復自姑孰北此身與此水日夜俱
無息関々林中鳥軟語如相識楊柳枝葉長青
青紙如昔惟予鬢間髮種々添新白開樽泛溪
水宛轉隨山色四方本予志夷險非我惻掛帆
出長江萬里追鵬翼

阻風飲酒

繫舟不能前酌酒聊自慰異鄉少親友市遠無
兼味惟茲佳山水渾々含正氣旁皇無賓主恣

取不為費王事不可緩簡書實吾畏夜晴如何
其呼吏者星緯

癸未季秋偕子仲都官文淵節推子堅

先輩同遊東湖分題得東字

高山據西南湖水自南東中有避漢人如彼雲
中鴻一日克諸已百世聞其風樂哉今日遊况
有賢者同

和廣漢見和東字二首

駕言欲何之于彼湖水東茫洋衆游魚凌厲一

歸鴻嚼蘂揖飛泉解帶臨清風寄聲詩中伯暇

日倘來同

出處勢不齊譬若西與東在陰有鳴鶴漸陸見

飛鴻禹稷顏回道下惠伯夷風故彼孺子者亦

庶與古同

與寧節推遊聘君亭邂逅廣漢同遊分

題得聘字

漢襄至威靈王室既不執豪傑死黨銅女嬖偷
權柄始彼孺子德譽南州盛耕稼以自食羞

詣安車聘彼非硜者而欲為奇行未能比禹
稷夫豈慚遽甯我登斯亭上悠然發幽興高山
知仰止池水不可涿魚戲芙蓉花鳧集參差荇
嗟嘆之不足俛仰成諷詠

送甯秀才過溪口占

邂逅吾所樂爰復惜分携繫帆且少留聊慰吾
所思嗟我行老矣志意非昔時鬢毛黑如漆種
種今如絲譬如七年牛力乏氣亦衰囁嚅食青
芻欲往脚自遲愛子齒未壯骨骼超等夷軒昂

宇宙間萬里惟所之舉足我即到寧復論華夷
行矣尚勉旃卒慰吾所期

沐浴有感

去垢如去邪不欲留毫分髮不止一沐身不止
三薰如何迷本原浴德不自勤區區養檝棘俯
仰愧前聞

答張天覺學士

龐蘊襄陽老精恠辛勤欲挾山超海破除枉被
馬師瞞扶起賴存靈照在最上一機終不傳喃

喃謾自費羅干晚年遭值張居士冷火寒灰更
熾然

內鄉先春

古寺前無廊空林中有亭浙水為襟帶蕭山作
畫屏仰高聽流水志體得所寧不能念羈旅天
地俱浮萍舉首望飛泉一云仰高日暮未肯歸
夜凉多好風明月有清輝一舉隨所之不如鴻
鵠飛思親淚如雨有露亦在衣未肯一
久雨

十日七日雨十步九步水師徒宿蓐莽宴坐吾
亦恥其誰護封穴未忍鳥鼠死天意若有謂無
人可言此

寄定州許資政

中行耀師寵北顧寬上憂惠澤蘓民瘵威名聞
鬼隄鹽梅合調羹帷幄聊運籌中山想可見更
登城上樓消患在未形患形其計難父老不言
兵朝廷今久安貴侯弄絲竹騎士矜綺紈念
須預防壯士心為寒非公能知微何敢失此言

月夜示子文
喜見明月到池東我時獨與孤轉同山光水色
飲不盡更煩佳木來清風浩歌一聲志萬里飛
飛欲到蟾蜍宮君家玉琴試借我為君寫盡絲
絃中

招趙溫甫飲

典衫買酒送春歸與春惜別無歡怡窮村荒涼
物色薄肥雞綠笋皆出雌却思清談醉我腹願
君促駕無遲

和蔣深甫雷亭韻

巉崑巨石藏蛟龍石破龍歸舊跡空風生江面
謝驚浪雨歇天涯橫斷虹高吟獨據一老木遠
望喜見雙飛鴻縱步忽逢溪上叟忘言疑是渭
濱翁

賦朱令水渠

宜城貌古心亦老自誇渠城非草草始挈孤忠
犯衆仇此身棄絕甘夷島異言塞盡流始通大
功成就民斯保天子虛心問民利利如此渠亦

須寶

諒閣聞笛

夜聞孤笛城頭上少年側聽成惆悵明月紛
送憂咽清風點來悽愴昂湖夢短飛不到蒼
梧望斷目幾耗此身犬馬賤徒勞君德丘山崇
未報

積德

積德由絲毫揚名滿天地古人成之難今人敗
之易不知責己重而獨於人備天下此說用無

亦殘風誼觀物竊有得作詩聊自誌

有感

吾身本山林艱難知備嘗天寒負書索萬里冒
雪霜山川風借力道路泥為漿瘦馬鞭不前悲
歌自慨慷今也偶得祿雖勞庸何傷念爾草野
夫百輩勤送將不惟風雪勤無乃田疇妨素餐
煩爾徒心顏兩愧惶作詩書諸紳庶幾久無忘

夜登竹亭

碧玉亭名多朝風蕭洒不及夜滄溟月飛出碎影

如刻畫愛君有素節霜雪不凋謝無言靜相對
似欲聞情話城上已三更欲歸猶未罷

輕舟

輕舟入深川鈍駒陟高山胡為棄安樂輕去趨
險艱一身事業荒雙親鬢髮班思之不遠慮覽
照胡為顏

鄰雞

鄰雞號清晨客子起長道二儀久風雨百里生
泥濘高山險難登鈍馬行欲倒僕勞請休息西

北日尚杲

寒食

山川路崎嶇于此遇寒食冒雨雖甚苦驅車不
遑息敵愁酒無功悅目花少色誰當逆旅思獨
任清吟力

遊子

遊子何所之上下山水中泛濫不繫舟飄飄孤
飛鴻揚朱泣路歧阮藉悲途窮我志非此流高
吟屬春風

春陟山登澗

此身何時休終日鎮衮、纔登澗之濱又陟山
之阪僕駕怯負重馬困憂途遠道路亦常態勉
旃強餐飯

偶題

雖然鳳之鷁傑然龍之駒九天無亂雲萬里多
坦途霜蹄風翻一朝舉疲駕鸞雀安能俱

贈君俞茶盃

人心一何巧得泥自山隅運泥置槃中百轉成

双盃粹質掩雪霜清輝奪璠璣精明絕隱匿潔
白無瑕汚慙慙持贈君意似生束芻

賦劉令公署雙頭芍藥

花容人所憐花意吾獨知雨露三月春齊榮一
織枝並立無妬心相逢况芳時長同白日照不
為顛風離世情正睽乖因賦芍藥詩

自誠

居方貴由禮待物當竭誠、亡鄙慮見禮去驕
心萌曾參日三省楊子嗟四輕勉旃踐此誠蠻

貂猶可行

寄春卿

相約童稚間遂成歲寒圖奈何離別多各自東
西隅我心明月輪子志青松株明月千里光豈
為吳越殊青松四時心豈為風霜枯相思不相
見作詩報區

自謝

瘠田歷水旱畝多荒蕪良農為鋤耰不歲成
膏腴瘦木僵風雪枝幹皆蟠迺良工試刻斲不

日成盤盂在人雖不肖蒙教當自殊重念賤子
庸僅同流俗愚學不達本原行又無廉隅九思
失孔戒三省忘曾模背道而妄行輕言以招辜
一身旅焚巢衆目睽張弧奔駟今逝矣玷圭可
磨乎晝寢過甚微聖門斥弗誅于今帝荒唐較
彼尤昏逾尚賴君子仁為包小人蒙未即遠方
屏止於鳴鼓攻過愆苟不滌憂慮環無窮歸來
訟醜跡欲自鞭微躬父母遣汝來期爾才德豐
親友壯爾行思爾事業充不泐仁義流反扇偷

情風固宜衆人歸詎可多雷同猶願追心從此
圖今終庶幾謝顏子自誓規繆公敢期白日光
重照幽谷中驅除困蒙吝震蕩迷復凶作詩代
負荆鄙誠實慙

衢州道中

登山復降山僕膝良已酸出溪復入溪僕衣未
嘗乾嗟余久羈旅囊橐亦已殫有充爾飢無衣
復爾寒買酒聊一醉行々莫長歎

冬日道中作

夜卧衾裯單不敢嗟體寒晨餐蔬食微不敢歎
腹飢重念飢寒民亦有甚我身我心若嗟吁彼
俗當何如

寄甯子文

相逢百笑東風前相別一醉昌江邊我來西山
春正研未見君子心欲燃紫泥詔命昂來矣黃
卷文章宜勉旃題柱相如知有志着鞭無使祖
生先

送蔣司勳赴河北漕使之竒

於皇時宋治定百年朝廷肅雍以有多賢蔣侯
孔碩克明其德其立疑、其嚴翼、英考是擢
以司邦直彼富貴不仁人則憚之侯曰吾治之
彼孤有幼人則侮之侯曰吾綏之竄逐流落江
湖東南侯曰行哉義豈吾慚皇帝思之擢使于
閩于淮于江治績升聞皇帝曰咨朕寵爾勤俾
相爾攸宜莫如河朔往都漕事以謀以度侯拜
稽首受命不敢居言秣其馬言脂其車駢、雖
疾而儀其車軒軒既博且閑蔣侯歸止覲于天

子天子是喜曰朕有賢卿士明、蔣侯政事文
章以明以將當至廟堂奚止河一方汝礪作詩
式贈其行俾人詠歌以永厥聲

送上官察院歸閩中均

南山幽幽非可陵之丘淵、其淵非橫汙之泉
我徒以趨君假我以車我泳而游君載我以舟
君行未至我心匪樂君去不遲如之何勿思是
用作歌以告吾懷

某偷墮不強日陷罪惡元忠哀憐念愚

未忍誅絕賜詩為戒佩服弗忘韻險
且長賡和未逮聊作短句以代負荆
小人無遠慮苟志懷與安富貴本浮雲百計圖
一完辰乎來之遲玩弄如等閑其不為禽狄不
能分寸間故人哀憐之投以藥石言伏讀夜達
旦顏汗肌骨寒顧惟壯盛時氣大力亦敦泰山
陟其巔不見宇宙寬蕩舟絕溟渤獨自觀其瀾
老大不自強喑嘿甘素飡更欲盜恩榮歸取妻
子歡自非仁人心孰肯救此患過惡苟容改勿

憚提耳煩大將書諸紳佩服永弗諼

蔣穎叔以廣陵詩見贈次其韻

久病乘秋足寒熱欲巢高木藏營窟衰遲不是
富貴人便合買田投印紱荆溪大士簡我詩坐
覺閭室陰雲披垢盡清明入兩目憂忘喜樂生
中脾絨膝局鑄欲自私不知半夜揚清輝兒童
恠駭私問我謂予蘊玉藏珠顆輜車近說足遐
觀煙霞日夜生毫端樓臺縹緲雲中寺衆馬不
前君獨至却躋双林跋提水更登百丈大雄山

游淮已擅中秋夜落帽須分九日天
茱萸准擬樓頭會終朝把酒千峯對
杖藜徒倚望八荒孤鴻飛出青雲外

擬田園樂六首六言

買田何須近郭作屋却要依山青松共我終始
白鳥隨人往還

春酒家、初熟春花處處光輝看花更携酒去
酒醉却插花歸

步月溪頭置酒野草不妨醉眠百歲獨多暇日

萬家共樂豐年

山色依雲閣淡溪聲漱玉玲瓏孤笛醉吹明月
扁舟卧釣秋風

霜寒禾黍初熟日落牛羊自歸樂事須還田舍
浮名不入柴扉

稚子騎牛橫笛老翁置酒高歌算來人生有幾
莫問世事如何

送許屯田

君嘗治浮梁德愛釣父母黎明令一出百里無

敢侮黠吏竄狐鼠惠愛沾農畝浮梁巧燒瓷顏
色比瓊玖因官射利疾衆喜君獨不父老爭歎
息此事古未有浮梁父老言自來作知縣不買
瓷器者一人君是也君嘗速我飲漓薄祗村酒君舉
少卿嗣宗是也買者一人今程長滿觴我畏不濡口京師晚相值相笑俱老醜
我欲提君名四方為奔走君立掉頭去自謝吾
無取移舟去都門待水三月久不一詣權貴掛
蓆隨南斗廬陵據艱險獄訟成淵藪君以一日
視無惡亦無苟三年最課上坐冠江西部我來

君及瓜欲荐嗟掣肘有才使如君未見終不售
即聽宣室召莫愛潮陽守廣東君潮陽

馬粹老謂黃龍祖心云得趣向處除煩
惱矣因以偈謁之

門：趙州門路、曹溪路此間無向背云何說
向趣佛遊五燭世不說無煩惱即是佛云何說
除掃

大暑道中

高堂卧清風顧我豈不欲王事不可緩驅車冒

炎酷赤日暴形骸毛髮幾焦禿義命有固然勤
勞不為辱

小舟過陂口

輕舟落陂濬脫去如一葉篙工習歌險振呼矜
巧捷急水生涼風盛暑慰汗浹涉遠雖力壯臨
危固心怯不如山居安魂夢亦安帖

大暑息林下

溪流轉東西日色不可障水風鼓炎熱如坐蒸
炊上幽林瀆山谷弛楫投清曠行矣難少留白

雲在吾望

老母德安縣君生辰頌時湖南奉使途

中作

有苗維冬有載維春維時斯成維誕斯辰婦妾
祇、兒女詵、是笑是言是祝是虔其德維何
維厚之坤其福維何維此之山嗟爾小子不克
駿奔靡不肅雖維我母賢無其中之有永其年

自勉呈尊叔

欲成九層臺不敢寧厥居昨朝雨暴圯敗祇須

史百年養不足一日毀有餘非叔有至言吾終
小人徒

和君時城上樂字韻

吾衰寡所欣惟子足與樂愛君凌雲氣更老更
充擴危城縱登眺萬里見澄廓中林韻秋風往
往中宮角瓊液白玉漿十分許君酌是非等毫
髮未足煩商榷貪狗終不還彼哉世人錯

長蘆阻風

縱目江南路繫船淮上村長蘆雲作陣高柳石

為根浪逐江風急潮連海水渾雪霜千雨散鉦

鼓萬兵屯蒲藻魚游處泥沙鳥篆痕參差隣盡

舫咫尺想空門泊舟處與諸君相隣不見數

往貝葉有秘語韋編無近言漫瞻双去翼空飾

兩朱轡好在彌天釋何如灸輟髡濁清羅酒竿

南北看風幡敬信無非事精微詎可論孤忠天

未棄尚合辱垂恩

路人有棄其子者因作是詩予時奉使

湖外

彼呱、者其孰棄之彼媛、者其孰收之彼禽
何知能字其鷓飛前則顧飢啄則呼孰謂斯人
禽之不如彼鷓之微皆得所依婉婉其音婆娑
其衣孰謂斯人乃獨無歸我號斯言以告採詩
和君時弟韻

流火退縮金盛強郊原日夜生寒涼梨垂粟鉞
橙柚香田家笑語炊黃梁山水秀澈搖秋光重
崑細菊斑、黃萬象呈露無遜藏時和歲豐辰
亦良脂車與子遊上方吐論縱橫氣軒昂書帙

羅列圖畫張睥睨孔孟窺虞唐偃息道奧緣禪
床苒、定者移星霜一云登逐高遠窮忽荒
不寐

吾行不能休中夜或不寐悠、此時心往返徧
萬類鰥魚固不暝夢蝶亦無事紛、爾何為百
慮終一致

和叔宜弟

悠、白雲飛戚、感我情白雲行四方顧我豈
憚行投袂起番水荷擔指宜城所懷再踰秋計

以頃刻成遠裝有書帙貧橐無金籬馬羸半徒
步僕瘦復兼程天寒雪頻飛山阻路少平林端
虎豹跡驛後豺狼聲我行有所懷雖壯如孩嬰
入門旅愁破待席春風生丁寧道懷感惻怛一
坐傾我今授汝記汝當以孝名孝能事其親榮
亦及乃兄乃兄久衰矣山川倦遐征歸與治爾
田我歸耦而耕

淚痕如雨欲垂又知汝心誠繫綵衣江外若逢

鴻鴈過時將音問寄庭闈

答張知常

曰歸去上鳳凰臺已見雲中鳴鴈來携酒幾時
窺北海采蘭三月去南陔山間鼠竊不為盜屋
上鶴巢無妄災但喜朝廷容正直更須郡守擇
賢才

今年夏南陽多盜繼有水災來詩及之故也

兩鬢蕭條今更衰菜羹祇似去年時甘從彭澤
淵明醉未肯牛山孔據悲泛菊想公多樂事及
瓜如我有歸期須穿略約行松徑尚見芙蓉出

槿籬

遊西山

我少及長從公遊我今老矣公白頭淵明彭澤
 不歸去太史周南方滯留爰山興與精神聚形
 骸自笑縻珪組欲騎馬去涉彼硯空羨鴻飛在
 于渚西山第一列洞天別有日月無歲年洪崖
 已成丹竈藥瑤池每賦白雲篇嘒嘒蟬噪竹枝
 露斑斑豹宿巔崖霧伯兮伯兮歸勿遽人間早
 歲須霖雨秋雨辛勤開菊花春風取次生蘭芽

我雖調公不敢易龍駒會去超胡沙

爰山樓歌

山隆然兮為屏樓縹緲兮浮空朝陽起兮輝
 白雲宿兮溶溶喬木兮陰泉飛兮瓏花香
 兮春雨鶴兮秋風企望焉兮徜徉橫四海無窮
 氣飄浮兮欲僊嗟勢利兮樊籠歸去來何為從
 公遊兮山之中

和彥衡直講四首

日隱天北角月飛海東頭清輝到堂除轉覺氣

象幽睥睨天地間無物奚為憂

是身如芭蕉况復身外名至人本無心肯為寵

辱驚

風隨月明來終夜共清白先生靜無語獨看庭

前栢冠帶褫客衣詩書倦塵迹好風此時來應

與君相識

照月槐影碎吹風栢聲繁悠：此時心可樂不

可言

使虜有懷

長年日戲老萊衣不忍此身終日違今日馬頭

燕北去不堪頻望白雲飛白雲汝飛去何許悠

悠會到江南路朔風吹淚洒大河直與波瀾競

東注

蘆花 六言

風起蘆花散雪紛：故着枯槎曉日曛曛照處

十分認作梅花

沙柳

沙陀祇見塵土柳色如逢故人憶着千條萬葉

金明馳道青春

韓氏周宣王時為侯嘗入覲而歸顯父
餞之尹吉甫作誦今司空康國公既
老元祐丁卯朝京師戊辰春還許天
子錫燕某賦是詩

在昔韓侯受命有周紹嗣禹功以續祖考韓侯
入覲玄衮介圭有淑其旆韓侯歸止顯父是餞
籩豆有踐奏鼓衍：韓侯燕喜既多受祉施于
子孫為宋柄臣有子且賢長則上公亦似前人

有赫厥庸公老許田載見式時朝有大疑公為
蒼龜公去不留天子是思薄言維之旗旒有輝
都人咸喜祝之千歲國有元老邦家是賴康公
之德寅亮孔碩利澤在民功在社稷孰能詩之
以繼韓奕誕發其聲施于罔極

舟中偶言

水聚即為漚、散還為水某祇這聚散中便是
真如理 英首座

和瑛師

去来的、然莫道無来去煙蘿寶峯境風月清
源路雨漲沒滄洲雲歸出孤嶼風便水亦便非
訟亦非訴是時師自豐城歸洪州而水便子

題本覺庵

本覺非今覺今覺如本覺悟得本覺時非覺非
非覺

鄱陽先生文集卷第三



